

INDEKS BELIA MALAYSIA 2015 DARI PERSPEKTIF BELIA POSITIF

WASITAH MOHD YUSOF, SHAHHANIM YAHYA, MASTURA MOHAMAD,
MOHD RIZAL MOHD SHAM & SHARIFFAH MAMAT

ABSTRAK

Artikel ini bertujuan mengukur kesejahteraan hidup dalam kalangan belia Malaysia yang diterjemahkan melalui penghasilan Indeks Belia Malaysia 2015 (IBM'15). Sejarah pembentukan IBM di Malaysia adalah merupakan antara negara terawal yang mewujudkan indeks yang mengukur kesejahteraan hidup generasi belia mereka dalam kalangan negara-negara Komanwel. IBM mula dibangunkan di Malaysia bermula pada tahun 2006 sebagai tahun asas, diikuti dengan penghasilan IBM pada tahun 2008 dan 2011. Penghasilan IBM pada tahun 2015 telah membawa pelbagai penambahbaikan berasaskan pembentukan indeks belia Malaysia tahun-tahun terdahulu. Penambahbaikan demi penambahbaikan ini berlaku berteraskan kepada senario semasa yang turut disokong oleh kepesatan perkembangan teknologi yang bergerak maju seiring dengan pembangunan belia yang dilihat dari kaca mata positif. IBM'15 dengan pembangunan 12 Domain dan 58 Indikator dihasilkan bertujuan bagi memantau perkembangan khusus dalam mengukur kesejahteraan hidup generasi belia pada masa kini. Antara Domain yang menjadi pemacu utama dalam mengesan kesejahteraan hidup belia Malaysia adalah Pembangunan Kendiri, Potensi Diri, Kesejahteraan Ekonomi, Penggunaan Media, Hubungan Sosial, Kesihatan, Keselamatan, Waktu Senggang, Identiti, Pendidikan, Sosialisasi Politik dan Bebas Tingkah Laku Devian. Kajian ini dilaksanakan ke atas 6,098 orang responden yang berusia di antara 15-30 tahun dengan menggunakan Blok Perhitungan bagi mengenal pasti lokaliti responden yang terlibat dalam kajian ini. Hasil IBM'15 secara keseluruhannya menunjukkan bahawa kesejahteraan hidup belia Malaysia berada pada tahap Sederhana iaitu pada skor 70.22. Berdasarkan dapatan IBM'15 dilihat masih banyak ruang penambahbaikan yang perlu dilaksanakan oleh pelbagai pihak bagi memastikan generasi belia Malaysia berada dalam acuan yang menjadi penentu pengisi kemakmuran dan pembangunan Malaysia pada hari ini.

Kata Kunci: Indeks Belia Malaysia, Domain, Indikator, Pembangunan Belia Positif, Kesejahteraan Hidup Belia.

ABSTRACT

This article is aimed at measuring the quality of life of the youth in Malaysia as a result of the creation of the Malaysian Youth Index 2015 (IBM'15). The creation of the IBM in Malaysia was one of the earliest amongst Commonwealth countries. IBM was built in Malaysia starting in the year 2006, its foundation year, followed by its development in 2008 and 2011. The creation of the IBM in 2014 helped bring vast improvements to the formulation of the IBM in the previous years. Increasing

improvement happens through the central reliance to current scenarios which are also supported by the rapid technological development; which is in line with the positive lens of youth development. With the development of 12 domains and 58 indicators created for the monitoring of growth, IBM'15 is able to measure the quality of life of the youth in status quo. A few domains that are the major driving forces behind quantifying the quality of life of the youth are Self Development, Self Potential, Economic Wellbeing, Use of Media, Social Relationship, Safety, Leisure Time, Identity, Education, Political Socialization and Free From Deviant Behavior. This study was carried out on 6,098 respondents from the ages of 15-30 years of age with the usage of the Accounting Block that determined the location of respondents in this study. The conclusion of IBM'15 as a whole showed that the quality of life of the youth in Malaysia is at an Average level with a score of 70.22. Based on the findings of the IBM'15, there is a lot of room for improvement in order to ensure that the Malaysian youth are in mould which becomes the determinant for prosperity and development of Malaysia today.

Keywords: *Malaysian Youth Index, Domain, Indicator, Positive Youth Development, Youth Wellbeing.*

PENDAHULUAN

Belia di Malaysia didefinisikan sebagai Warganegara Malaysia yang berumur tidak kurang dari 15 tahun dan tidak lebih dari 40 tahun melalui Akta Pertubuhan dan Pembangunan Belia 2007 (Akta 668). Populasi belia di Malaysia merupakan sebahagian besar daripada bilangan penduduk iaitu menghampiri 50%. Kesejahteraan golongan belia merupakan indikator terpenting dalam menentukan kesejahteraan negara. Kementerian Belia dan Sukan melalui Institut Penyelidikan Pembangunan Belia Malaysia (IYRES) telah membangunkan Indeks Belia Malaysia (IBM) bermula sejak pada tahun 2006 bagi mengukur dan memantau kesejahteraan hidup belia. IBM seterusnya telah dilaksanakan pada tahun 2008, 2011 dan terkini pada tahun 2015. Malaysia merupakan negara Asia Tenggara terawal yang telah membentuk Indeks Belia sebagai usaha menambah baik inisiatif dan strategi pembangunan belia di Malaysia.

Pembentukan IBM merupakan satu cabaran kepada Kementerian Belia dan Sukan (KBS) bagi memantau secara empirikal mengenai keberkesanan program-program pembangunan belia secara keseluruhannya yang dijalankan oleh pelbagai pihak merentasi Kementerian, agensi, Badan Bukan Kerajaan (NGO) dan sebagainya. Kewujudan IBM dengan sendirinya menunjukkan ketelusan dan akauntibiliti semua pihak yang bertanggungjawab dalam agenda membangunkan generasi belia Malaysia.

Kewujudan IBM pada tahun 2015 telah memberikan satu lonjakan lagi kepada KBS apabila IBM telah diangkat dan dicadangkan akan dijadikan sebagai Key Performance Indicator (KPI) di peringkat nasional oleh agensi pusat

iaitu di Economic Planning Unit (EPU) di Jabatan Perdana Menteri. Menerusi pengiktirafan terhadap IBM ini telah diwujudkan Technical Working Group (TWG) bagi menghasilkan satu Pelan Tindakan Bersepadu dalam memastikan berlaku peningkatan pada nilai skor dan tahap kesejahteraan belia Malaysia dengan melibatkan komitmen pelbagai Kementerian, Agensi, NGO dan sebagainya.

Pembentukan IBM yang semakin mendapat perhatian khusus dalam usaha perancangan dalam kalangan penggubal dasar ini akan diterjemahkan dengan pelaksanaan aktiviti/program di peringkat kementerian yang berkaitan dengan domain-domain dalam IBM'15. Usaha secara bersepadu ini merupakan teras bagi meningkatkan kesejahteraan hidup belia Malaysia mengikut acuan dan cara kita sendiri.

METODOLOGI

IBM 2006 dan 2008 merangkumi 8 domain yang mengukur kesejahteraan hidup belia dan pada tahun 2011 terdapat 9 domain IBM. Bagi tahun 2015 pula, IBM mengandungi 12 domain dengan pertambahan 3 domain berbanding IBM sebelum ini. Domain-domain IBM bagi tahun 2015 merangkumi 1. Pembangunan Kendiri; 2. Hubungan Sosial; 3. Identiti; 4. Potensi Diri; 5. Kesihatan ; 6. Aktiviti Waktu Senggang; 7. Penggunaan Media; 8. Bebas Tingkah Laku Devian; 9. Kesejahteraan Ekonomi; 10. Pendidikan; 11. Keselamatan; dan 12. Sosialisasi Politik.

Indeks Belia Malaysia 2015 (IBM'15) yang telah dibangunkan ini dilaksanakan menggunakan kaedah tinjauan/survei menggunakan borang soal selidik. Bagi penganalisan data, kaedah kuantitatif telah digunakan bagi tujuan tersebut. Pensampelan kajian yang terlibat dalam kajian IBM bermula 2006 sehingga 2011 iaitu terdiri daripada mereka yang berumur dari 15 hingga 40 tahun, walau bagaimanapun bagi IBM'15 umur belia yang terlibat adalah berdasarkan Dasar Belia Malaysia 2015 iaitu belia yang berumur antara 15-30 tahun. Pada tahun 2015, belia warganegara Malaysia yang berumur antara 15 hingga 30 tahun berjumlah seramai 8.097 juta (Anggaran Penduduk Pertengahan Tahun berasaskan data Banci Penduduk dan Perumahan Malaysia 2010, Jabatan Perangkaan Malaysia 2015). Oleh yang demikian seramai 6,098 orang telah diambil sebagai responden kajian ini. Kaedah pemilihan sampel adalah menggunakan Blok Penghitungan (BP) Banci 2010. Dalam setiap BP, terdapat sejumlah 80 – 120 Tempat Kediaman (TK) dengan anggaran 600 residen. Sebanyak 16 TK dipilih dan pensampelan berstrata digunakan, iaitu mengikut pembahagian negeri, daerah dan kawasan. Ini bagi memastikan populasi sasaran mendapat peluang yang sama untuk dipilih. Khidmat nasihat Jabatan Perangkaan Malaysia turut diambil kira untuk memastikan sampel yang terlibat adalah menggambarkan pensampelan nasional.

Selain itu bagi pembentukan instrumen kajian, reka bentuk borang soal selidik telah diperkukuhkan melalui perbincangan kumpulan berfokus melibatkan belia daripada pelbagai latar belakang. Selain itu, kajian rintis berinteraktif dijalankan untuk

memastikan penggunaan perkataan dan pernyataan bagi setiap item adalah jelas maksudnya dan relevan kepada responden. Pembentukan borang soal selidik ini juga dibantu oleh beberapa agensi berkaitan seperti Kementerian Kesihatan, Jabatan Penjara, NGO dan pemimpin belia. Manakala pengumpulan data dijalankan oleh enumerator terlatih yang mewakili 13 buah negeri dan tiga (3) Wilayah Persekutuan di Malaysia. Manual bertulis merangkumi semua maklumat yang diperlukan telah disediakan berserta dengan peta BP. Rakaman klip video simulasi sesi pengendalian temu duga bersemuka turut dibekalkan.

Bagi memperoleh nilai skor IBM'15, purata skor bagi semua domain dikira. Skor Indeks Belia Malaysia dibangunkan dengan menggunakan skor "100" sebagai asas pengiraan skor maksimum manakala "0" adalah nilai skor minimum. Ini bermakna, lebih tinggi skor IBM maka lebih baik kesejahteraan hidup golongan belia di Malaysia dan begitulah sebaliknya. Untuk memudahkan pemahaman tentang prestasi belia bagi setiap domain, skala di bawah digunakan. Skala ini menggambarkan bahawa, sekiranya nilai skor yang diperoleh antara 80 hingga 100, maka skala yang diberikan adalah 'Sangat Memuaskan'. Bagi nilai skor 75 hingga 79, skala yang diberikan adalah 'Memuaskan', diikuti 60 hingga 74 'Sederhana', 50 hingga 59 'Kurang Memuaskan', 40 hingga 49 'Tidak Memuaskan' dan nilai skor 0 hingga 39, maka skala yang diberikan adalah 'Sangat Tidak Memuaskan'.

KEPENTINGAN

Kepentingan pelaksanaan IBM telah diperakui di peringkat antarabangsa melalui "Asia Region Commonwealth Youth Ministers Meeting" yang diadakan di New Delhi, India baru-baru ini dan Malaysia merupakan negara terawal yang telah mempunyai indeks belia. Melalui mesyuarat tersebut juga, Malaysia telah diminta untuk berkongsi kepakaran bagi menghasilkan indeks belia di negara-negara anggota yang lain. Sehingga kini, pembentukan IBM telah mendapat pengiktirafan di peringkat tempatan dan antarabangsa. IBM juga merupakan elemen pengukuran pencapaian pembangunan belia bagi Rancangan Malaysia Kesebelas. Melalui IBM diharapkan usaha bagi membangunkan belia dapat dilaksanakan mengikut keperluan dan kepentingan belia serta kesejahteraan hidup belia dapat diperbaiki dan ditingkatkan dari semasa ke semasa.

PENCAPAIAN SKOR MENGIKUT DOMAIN

Skor keseluruhan IBM'15 berada pada tahap Sederhana dengan nilai skor sebanyak 70.22. Seperti mana Jadual 1, terdapat dua domain yang berada pada tahap Sangat Memuaskan iaitu skor bagi Bebas Tingkah Laku Devian (skor 89.45) dan Waktu Senggang (skor 81.02). Nilai skor bagi domain Bebas Tingkah Laku Devian menggambarkan bahawa Tingkah Laku Devian dalam kalangan belia Malaysia berada dalam keadaan terkawal. Secara keseluruhannya majoriti belia Malaysia mempunyai kesedaran yang jelas tentang tingkah laku yang bertentangan dengan norma-norma masyarakat dan berupaya mengawal diri mereka daripada terjerumus

dengan tingkah laku devian. Walau bagaimanapun, skor ini perlu ditingkatkan lagi agar isu-isu yang melibatkan Tingkah Laku Devian dalam kalangan belia dapat diminimumkan.

Jadual 1: Skor Indeks Belia Malaysia 2015

Domain/Indikator	Nilai Skor
Domain Bebas Tingkah Laku Devian	89.45
Domain Waktu Senggang	81.02
Domain Hubungan Sosisal	78.18
Domain Penggunaan Media	73.59
Domain Pembangunan Kendiri	72.60
Domain Pendidikan	71.22
Domain Keselamatan	70.82
Domain Identiti	69.14
Domain Kesihatan	68.42
Domain Potensi Diri	68.13
Domain Kesejahteraan Ekonomi	54.26
Domain Sosialisasi Politik	45.82
Keseluruhan Skor IBM'15	70.22

Begitu juga dengan nilai skor domain Waktu Senggang yang diperoleh. Pencapaian skor ini terletak dalam kategori Sangat Memuaskan yang membawa maksud bahawa belia Malaysia sangat aktif terlibat dalam aktiviti sukan dan juga pelbagai aktiviti seperti blogging, melayari laman sosial, membeli belah, melakukan aktiviti hobi, berekreasi dan sebagainya. Walau bagaimanapun pemantauan harus dilakukan bagi memastikan beberapa aktiviti waktu senggang seperti blogging dan membeli belah menjadi aktiviti yang memberi manfaat sama ada kepada individu mahupun masyarakat secara keseluruhannya.

Terdapat satu domain yang berada pada tahap Memuaskan iaitu domain Hubungan Sosial (skor 78.18). Skor yang diperoleh menunjukkan masih kurangnya pergaulan antara belia dengan masyarakat atau jiran tetangga menyebabkan hubungan belia dan masyarakat menjadi renggang. Selain itu, walaupun hasil kajian mendapati belia amat rapat dengan ibu bapa serta ahli keluarga mereka, namun nilai skornya perlu dipertingkatkan. Hasil penemuan ini mungkin berkait rapat dengan peningkatan peluang komunikasi seperti melalui jaringan media sosial yang membatasi komunikasi yang berkualiti bersama keluarga, rakan dan masyarakat.

Manakala sebanyak tujuh domain berada pada tahap Sederhana iaitu domain Penggunaan Media (skor 73.59), Pembangunan Kendiri (skor 72.60), Pendidikan

(skor 71.22), Keselamatan (skor 70.82), Identiti (skor 69.14), Kesihatan (skor 68.42), dan Potensi Diri (skor 68.13). Bagi domain penggunaan media, pencapaian skor ini berada dalam kategori Sederhana yang memberikan gambaran bahawa, belia Malaysia melibatkan diri secara sederhana dalam menggunakan media dan tidak menjurus kepada ketagihan kecuali penggunaan telefon bimbit lebih tinggi secara relatif. Memandangkan akses kepada media ini merupakan satu tuntutan keperluan masa kini khususnya dalam kalangan belia, hasil dapatan domain penggunaan media ini memberi kesedaran tentang kepentingan untuk mewujudkan satu garis panduan yang berupaya untuk memandu belia Malaysia dalam menggunakan media secara sihat dan beretika.

Begitu juga dengan domain Pembangunan Kendiri, ke semua indikator yang terkandung dalam domain Pembangunan Kendiri ini merupakan elemen terpenting yang melengkapi pembangunan personaliti unggul golongan belia. Justeru, indikator-indikator yang merupakan aset penting bagi pembangunan diri individu ini sewajarnya dibangunkan secara kolektif agar berada pada tahap sangat memuaskan. Tahap Pendidikan generasi belia juga masih di tahap sederhana yang menggambarkan perlunya usaha-usaha meningkatkan lagi taraf pendidikan di negara ini. Pencapaian Pendidikan atau '*educational attainment*' merupakan indikator penting bagi mengukur kesejahteraan individu kerana ia sering kali dikaitkan dengan kebolehpekerjaan dan juga upah atau gaji diperoleh.

Domain Keselamatan secara keseluruhan berada pada tahap sederhana. Ini menggambarkan perlunya usaha yang dilakukan oleh pihak penguat kuasa bagi menyediakan program yang bersesuaian kepada belia Malaysia agar aspek keselamatan dapat dipertingkatkan lagi terutama dari segi kempen kesedaran dan amalan keselamatan di kawasan komuniti setempat.

Bagi Domain Identiti, domain ini secara umumnya mencerminkan sejauhmana belia Malaysia mengekalkan identiti mereka sebagai rakyat Malaysia. Lima indikator telah digunakan untuk mengukur indeks domain Identiti iaitu Daya Saing, Kesukarelaan, Patriotisme, Semangat Perpaduan dan Integriti. Dapatan ini menunjukkan terdapatnya keperluan untuk mengemaskini dan membuat penambahbaikan program-program bagi aspek daya saing, kesukarelaan dan patriotisme belia.

Skor keseluruhan kesihatan generasi belia Malaysia juga masih di tahap sederhana. Daripada tujuh (7) indikator dalam domain ini, indikator amalan pemakanan mempunyai nilai skor yang terendah iaitu 43.52 yang berada pada tahap tidak memuaskan. Ini menggambarkan bahawa generasi belia kurang memberi penekanan terhadap corak pemakanan yang berkhasiat mengikut piramid makanan yang disarankan oleh pakar kesihatan serta mengamalkan pengambilan makanan segera (*fast food*). Justeru amat penting untuk memastikan tahap kesihatan belia ini dipertingkatkan memandangkan tanpa kesihatan yang kurang baik, kesejahteraan yang holistik sukar untuk dicapai. Kepentingan domain ini serta sensitiviti belia kini

yang semakin cakna akan isu kesihatan memberi gambaran bahawa usaha-usaha peningkatan taraf hidup ini perlu difokuskan dan diperbaiki oleh pelbagai pihak.

Potensi belia juga masih berada di tahap sederhana dan ia perlu digilap bagi memperkukuhkan dan menyerlahkan potensi golongan belia menerusi ekosistem yang lebih kondusif. Di bawah potensi diri dua (2) indikator utama iaitu kepimpinan dan keusahawanan perlu diperkemas. Belia memerlukan bimbingan khususnya daripada aspek kepimpinan agar transisi perubahan umur kepimpinan belia berdasarkan Dasar Belia Malaysia yang berumur 15 hingga 30 tahun daripada umur kepimpinan asal 15 hingga 40 tahun berjalan dengan lancar. Begitu juga ciri-ciri keusahawanan perlu dipertingkatkan bagi melahirkan belia yang mampu bersaing dan kurang bergantung kepada pihak kerajaan.

Terdapat dua domain yang perlu diberikan perhatian yang lebih khusus iaitu Kesejahteraan Ekonomi (skor 54.26) berada pada tahap Kurang Memuaskan dan domain Sosialisasi Politik (skor 45.82) berada pada tahap Tidak Memuaskan. Tahap kesejahteraan ekonomi yang rendah akan membawa kepada pelbagai masalah seperti ketidak seimbangan dalam taraf kehidupan, mengundang faktor-faktor masalah sosial dan kurangnya keharmonian khususnya dalam keluarga dan masyarakat. Manakala bagi isu sosialisasi politik pula, belia masih kurang terlibat dengan aktiviti-aktiviti dan kurang ambil kisah tentang isu-isu politik semasa. Kedua-dua domain ini memerlukan satu diagnosis yang terperinci bagi mengenal pasti faktor-faktor penyebab dan juga kaedah penyelesaian yang boleh diambil.

KESIMPULAN

Secara keseluruhannya, hasil daripada IBM¹⁵ menunjukkan masih terdapat banyak penambahbaikan yang perlu dilaksanakan bagi meningkatkan prestasi nilai skor indeks ini pada masa akan datang. Berdasarkan 12 domain dan 58 indikator yang telah dibangunkan, terdapat keperluan untuk melakukan lonjakan serta inovasi ke atas kumpulan belia yang mempunyai skor domain dan indikator yang berada pada tahap memuaskan agar mereka lebih dinamik dan kompetitif.

Selain itu, bagi domain dan indikator yang berada pada tahap sederhana memerlukan pelaksanaan program intervensi dengan kerjasama kerajaan, pihak swasta, komuniti, pemimpin masyarakat dan pemegang taruh belia bagi memastikan setiap usaha pembangunan belia ini dibuat secara bersepadu agar memberi impak yang maksimum. Manakala kepada keputusan skor kurang baik atau di tahap rendah perlu menjalankan diagnosis yang lebih terperinci serta perbincangan dalam kumpulan fokus agar mereka lebih terarah untuk mencapai tahap sangat memuaskan dalam kesejahteraan hidup belia.

Berdasarkan dapatan kajian ini juga, program-program kesedaran dan program-program pendidikan ini dirancang untuk dilaksanakan secara berkala dalam Rancangan Malaysia Kesebelas (RMKe-11) dalam usaha meningkatkan

pencapaian skor IBM'15. dapatan IBM'15 juga ditransformasikan dalam bentuk Pemetaan Belia Malaysia (PBM) secara thematic bagi mengatur perancangan strategik berdasarkan analisis keperluan mengikut kawasan “hot spot” hingga ke peringkat daerah. Pelaksanaan program-program kesedaran dan program-program pendidikan dirancang mengikut keperluan dan kepentingan di peringkat akar umbi bagi meningkatkan kesejahteraan hidup belia. PBM boleh diakses melalui laman web petabelia.kbs.gov.my.

RUJUKAN

- Dasar Belia Malaysia. 2015. Kementerian Belia dan Sukan Malaysia
- Indeks Belia Malaysia 2015. 2015. Institut Penyelidikan Pembangunan Belia Malaysia. Kementerian Belia dan Sukan Malaysia.
- Pelan Strategik Kementerian Belia dan Sukan. 2010. Kementerian Belia dan Sukan Malaysia
- Pelan Strategik IYRES 2013-2015. 2013. Institut Penyelidikan Pembangunan Belia Malaysia (IYRES). Kementerian Belia dan Sukan Malaysia.
- Rancangan Malaysia Kesebelas 2016-2020. 2015. Kementerian Kewangan Malaysia.

Profil Penulis:

Wasitah Mohd Yusof, PhD

Pembangunan Belia

Ketua Pegawai Eksekutif

Institut Penyelidikan Pembangunan Belia Malaysia (IYRES)

Shahhanim Yahya

Kajian Pengguna

Penyelidik Kanan IYRES

Mastura Mohamad

Psikologi

Penyelidik Kanan IYRES

Mohd Rizal Mohd Sham

Psikologi

Penyelidik IYRES

Shariffah Mamat

Msc Komunikasi Korporat

Penyelidik Kanan IYRES